

合江縣志

貳集

星野

圖考

沿革

疆域

形勢

山川

合江縣志卷一

星野志

通志瀘州井鬼之次入參四度合江同州郡入躔次云

度牂牁入參五度州介犍為牂牁間故入參四度

按屬禹貢梁州之域周禮保章氏以星土辨九州
註觜參主益州春秋元命苞符云觜參流為益州
史記天官書謂益州為參分又載東井輿鬼分屬
雍州秦地也蜀志所云星應輿鬼與秦同分此井
鬼入參之所本也省志載成都屬人參一度瀘州

合江縣志

卷之一

星野

一

屬入參四度考明史四川所屬惟綿州觜分合州
參井分餘皆井鬼分而無入參之說又星經一度
統二千三百九十二里統地三千九百三十二里
成瀘相距未至一千里不應隔三度之遙惟黃鼎
度星通議每度約二百五十里似屬有合然與前
說又懸殊也蔡邕月令章句自畢六至井十為實
沈之次屬晉分野井十至柳三為鶉首之次屬秦
分野而胡韞乃謂自井五至柳八鶉首之次為秦
分野二說已有不同明史則謂自畢七至井八實

沈之次井九至柳三鶉首之次所論又異也至稱
觜宿唐測在參前半度元測在參前五分今測已
浸入參宿故舊法先觜後參今則先參後觜又觜
宿中之座旗九星今只存五而少其四井宿中之
軍市十三星今只存五而少其八鬼宿中之外廚
六星今亦只存五而少其一其他或古有而今無
或古無而今有其故何歟黃氏有天運變地勢變
人事變三說誠定論也附錄於後以備參考

黃鼎分野更變議曰星野之分雖有定屬世歷千

古不能無變也有因天運而變者有因地勢而變
者有因人事而變者以天運之宿度分於黃道黃
道遷於歲差於宿屬斗末者或變而爲牛初則野
之隸於斗末者亦當更而爲牛初矣此因天運之
變而分野當改也以地勢而論之據吳越相隔一
浙風俗音容好尙頓殊是人物限於山川而山川
限爲分野惟山亙古今而不變然則川或有壅塞
或有開導河或有遷徙如汴城或徙於河之北復
更於河之南則亦當隨其遷徙壅導而判其分野

矣此因地勢之變而分野當改也以人事而論之據魏徙大梁則西河合於東井秦拔宜陽則上黨入於輿鬼或昨屬荆豫今隸青兗朝爲零桂之士夕爲廬九之民此因人事之變而分野當改也三才交變如此分野之說豈可泥於一定而無變通之議耶

附

山陰江承烈分野辨云古今人屢辨而終不可辨者莫甚於分野之說矣天與地精氣相感地有是

合江縣志

卷之一

星野

三

形天卽有是氣故在天爲分星在地爲分野是亦理之可信者也自周禮保章氏以星土辨九州之地後世儒者莫不宗之但星經旣亡今所據者止班固所著漢志鄭康成引十二次之分以相屬而魏太史令陳卓更分繫二十八宿悉載郡國各所值宿度可謂詳矣然卽其言攷之可疑者不止一端揚在東而星紀則在北雍在西而鶉首則在南冀在北而大梁則在西齊魯俱在東而降婁乃在北是躔次之參差可疑也衛在河內與并無涉也

乃衛不屬豫而屬并魯在山東與徐無涉也乃魯不屬兗而屬徐晉在太原與益無涉也乃晉不屬冀而屬益是州郡之錯互可疑也夫州郡錯互則地與地不相合躔次差參則地與天不相合夫既不相合如此尙欲泥其書以驗災祥而決休咎豈有當乎論者以爲分野占驗自古不爽當時必有所據而然或云封國之年其歲星所在之辰卽屬分野則同歲受封者必多何以齊魯宋鄭諸國各分躔次而決不相侔此不問而知其非也唐一行

則云星之與土以精氣相屬不係乎方隅其占驗以山河爲界不主於州國其說似矣然不過意爲揣測耳又安能取夫參差之星錯互之地條分縷析一一相配而錙銖不爽也哉且不特此也天以下大矣廣矣決不止於中國也雖鄒衍之論迂誕不足深信然旣謂之中國則東西南朔之爲外國者不知凡幾其分星分野當必無異攷昴畢之界曰天街天街者中與外之交也天之不詳內而略外可知也必若諸儒之論是天已盡於中國而中

國之十有二州已盡天之三百六十五度矣豈理也哉或曰五車五星其次舍在畢星書謂主秦趙七國北斗七星其次舍自張而角星書亦謂主秦楚七國或又曰牛女下有十二國星東起越西至鄭鄭夾滌謂天之所覆廣而中國所占止此十二星或又曰天市垣有列國星二十二起宋至河中所謂分野者指列國諸星而言也夫五車北斗何所見而謂主七國星書固不足據牛女下之十二星天市垣之二十二星在天業有其象則列國之

休咎自應於此星占之較之十二次分野之言似爲勝矣然中國所占僅此則此外之災祥皆可置而不論又何以五星聚井而沛公帝彗星掃秦而苻堅危熒惑守心而宋憂景星見尾而燕盛也哉吾故曰辨之而終不辨者分野之說也然則奈何曰辨之而終不辨莫若以不辨辨之夫人主之於天也蓋無事不當警無處不當警者也必曰某事徵某應此劉向五行傳之謬也必曰某星應某地此亦漢以來諸儒之失也且往者分建列國固有

分野之說令之各警天戒今四海一家則周天之
休咎皆皇極之徵應也何必紛紛攷分野之同異
爲哉